

Seken Timoti Nægkiariien sə rani mə nəfe i nəkukuə

Nəp̄in Pol ruvərai raka Fas Timoti mine Taetas kətoni mə kəkwtəmhiri mwi in kuvei puvnimwə ia kalapus. Nənə in r̄irai Seken Timoti ia kalapus fwe Rom. Pol rukurən mə nəp̄in səvənhi ruvəkwa kwa mə tremhə ro pen r̄irai nəkukuə i revən ti Timoti. Pol rəpwəh nōkeikeiien mə trətōni a Timoti, mətə rokeikei mə trətōni nənə muvehi utə nətəriq̄ien səvənhi ti nəri nə mə in rokeikei mə nəp̄in tremhə Timoti truvehi təmwhək̄in ia wok səvənhi. Pol ramahatən Timoti ia niriien nakalasia me maməvəhag min mə trərer isipw̄in ti nahatən eikuə me. Pol raməvəhag m Timoti mə Timoti traməkeikei məkwtəmhiri əknek̄in nəgkiariien sə ro n̄ipər̄hienien i kamahatən nakalasia me səvəi Kristo irə.

¹ Iou Pol. Iou aposol riti səvəi Iesu Kristo ti nəri nə mə Kumwesən r̄iməni nəkwan mə tako. In rər̄hi pen iou mə takəvisau irapw n̄im̄iruien sə in r̄iməni mə truvei pehe m kitaha ruku pen ti Iesu Kristo.

² Nəkukuə i rauvehe tukw ik, Timoti, nər̄ik keikei.

Pwəh Kumwesən Tata səkitaha mine Iesu Kristo Iər̄imənu səkitaha trouəriari pehe namasanien mine nap̄iien mine nəmər̄inuien mik.

Pol raməvəhag m Timoti

³ Ia nəpɪn mine ia ran, nəpɪn iakaməfwaki, rerik ramrhi rerin ik, nənə iakani vivi Kumwesən tukw ik. Iakamo tukwini nari min, mamō a noien me səməme iakukurən mə hatukwatukw ia nənimen rəmwhen ia kaha kupwən me səiou hənamo. ⁴ Nəpɪn rerik ramrhi nise nənimem sə rinaiu, iakokeikei pik mə takətōni ik, nənə rerik ragien. ⁵ Rerik ramrhi nahatətəien pərhiēn səim, in nəha nahatətəien sə kaha pran səim Loes mine mama səim Iunis kroukupwən rouahatətə irə, nənə təkwtəkwuni iakukurən amasan mə ik mwi ikamahatətə irə. ⁶ Ro iamɪnhi irə iakuə tako pwəh rerim ramrhi nəri fwe ia rerim ramo ikamskai ti noien wok səvəi Kumwesən. Kumwesən rəriari nəri nəha mik fwe kupwən nəpɪn iakəmri utə rəgik mi ia niram. Tikaməkeikei meireiri nəri nəha pwəh ruək. ⁷ Iakani iamɪnhi irə ti nəri nə mə Kumwesən rɪpkuvei pehe mhə m kitaha nənimwɪn riti sə ramo kitaha samhekɪr, mətə in ruvei pehe m kitaha nənimwɪn riti sə ramo kitaha saməskai, mamhokeikei kitaha me, mamhəkoui atukw kitaha mə tsəpko mhə noien ərəha.

⁸ Ro iamɪnhi irə tikəpwəh naurisien ti nini irapwien Iərimənu səkitaha, məpwəh naurisien mwi tukw iou, iərmama riti səvənhi sə iakamarə ia kalapus tukwe. Mətə pwəh krau pəri krouregi nəmisəien ti nəgkariien amasan səvənhi. Kumwesən truvei pehe niskaiien mik mə tiko iamɪnhi. ⁹ In rɪməvehimɪru kitaha, nənə, məkwein kitaha ia nəkweinien sə ro ikinan i. In rɪpko mhə iamɪnhi irə ia kitaha ti noien me

səkitaha, mətə in ro iam̄nhi irə ti nəri nə mə resi pen a nətərigien atukw səvənhi sə in ruvəukurən raka fwe tui nəp̄in tiprənə ramiwən ihi. Ia nəp̄in nəha in ruvəni raka mə truvei pehe namasanien səvənhi m kitaha truku pen ti Iesu Kristo. ¹⁰ Nənə təkwtəkwwuni sətoni namasanien nəha ro m kitaha, ti nəri nə mə ləmə sə rauvehim̄iru kitaha r̄im̄aier pehe. ləmə nəha in nə Iesu Kristo sə r̄ino sampam ia noien iərmama remhə, nənə ia nəgkiariien amasan səvənhi ramo nərmama me hətoni mə tuhəfo mhəuvehi n̄im̄iruien rer̄in. ¹¹ Kumwesən r̄inər̄p̄wi rəgin ia nirak, m̄ini mə iou aposol riti sə takaməkeikei məvisau nəgkiariien amasan nəha, mahatən nərmama me irə. ¹² Nənə ti nəri nə mə iakamo iam̄nhi irə, iakamregi rərəha i ia kalapus. Mətə iapkauris mhə, ti nəri nə mə iakukurən iəmə sə iakani n̄ipər̄hienien irə. In rəmri pehe nəgkiariien amasan səvənhi ia rəgik, nənə iakukurən amasan mə trətui amasan tukwe mamevən meste nəp̄in səvənhi.

¹³ Timoti, tikaməkeikei məkwtəm̄hiri əknek̄in nəgkiariien me i səməme ikuvəregi raka iakini pehe tukw ik i. Nəgkiariien me nəha hatukwatukw, mamhahatən suatuk sə tikesi pen. Tikaməmwur pen ia noien mi nəha nahatətəien m̄ine nokeikeiien sə krauku pen ti Iesu Kristo. ¹⁴ Ia n̄iskaiien səvəi Nən̄im̄w̄in Ikinan sə ramarə ia reritaha tikaməkeikei mətui amasan ti nəri amasan sə kəmri pehe ia rəgim.

¹⁵ Ikuvəukurən raka mə nərmama pam fwe profens Esia hənəpwəh iou mhəuvavən. ləmə mi nəha

1:10: 1Kor 15:55-57, Hip 2:14
1:10, 1Tim 4:6, 6:3, Taet 1:9, 2:1

1:11: 1Tim 2:7

1:13: 1Tim

1:14: 1Tim 6:20

Fukelas mine Hemokenes irəha minraha.

¹⁶ Mətə iakaməfwaki mə lərimənu səkitaha trapi nərmama me ia nəkwai nimwə səvəi Onesiforas, ti nəri nə mə nəpin rīpik in ramomasan iou, nənə mīpkauris mhə iou mine jen me kinərihi iou irə.

¹⁷ Mətə nəpin rapirapw ia Rom, ramətui əmisə iou mamevən meste mətə iou. ¹⁸ Iakəfwaki mə Kumwesən trəsəni in rətoni lərimənu səkitaha trapi in ia nəpin səvənhi. Nənə ikukurən amasan mə rasitu pīk ia nirak fwe ia Efesas.

2

¹ Ro iamīnhi irə, nərik, ik tikaməkeikei muvehi namasanien i raku pen ti Iesu Kristo pwəh ro ikiskai. ² Nənə nəgkiariien sə ikuvəregi raka iakinahatən kimiaha irə ia nəmri nərmama me həpik, tikaməkeikei məmri pen ia rəgi nəmə me nepwīn ikukurən nətigiteien ia nirəha mə tuhahatən nepwīn mwī. ³ Tikəmisə krau mik rəmwhen ik iaruagən amasan riti səvəi Iesu Kristo. ⁴ Ikukurən noien səvəi iaruagən. Nəpin ramaruagən, ko rəpwəh nuvehien mwī wok me nepwīn, ti nəri nə mə raməmwur mə iəmə asori səvənhi rerīn tragien. ⁵ Iərmama səvəi naiuien traməkeikei mesi pen natuakəmien me səvəi naiuien. Mə rəpwəh ko kīpkəfəfau pen mhə kəfəfau səvəi nisaiien irə. ⁶ Nənə iərmama sə raməmhū pīk ratukwatukw mə in trukupwən mesi kwənkwai nari sə rutə ia nəmhien səvənhi. ⁷ Rerim tramrhi nəfə iakamīni pehe tukw ik i. lərimənu səkitaha truvei pehe nukurənien mik, nənə tikukurən narimnari me pam.

⁸ Rerim tramrhi Iesu Kristo. In iamə sə rinətui mwi ia nemhəien səvənhi. In kwənəkʷus səvəi Kig Tevıt. In i nəgkiariien amasan sə iakaməvisau irapw. ⁹ Iou iakamregi nəmisəien ti nəgkiariien amasan i. Kınərihi iou ia jen rəmwhen ia iou iamə iakamərui loa, mətə nəgkiariien səvəi Kumwesən ko kıpkerihi mhə ia jen. ¹⁰ Ro iamınhi irə, nəri auər a mə kamo nəmisəien me ia nirak, mətə takaməkeikei mamərer əknekın ia nəpın me ti nəri nə mə rerik ramrhi nərmama me nəha səməme Kumwesən ruvərfi raka irəha. Ikokeikei mə irəha mwi tuhəuvehi nimiruien vi sə raku pen ti Iesu Kristo, nənə mharə rerin irəha min ia nukuraanien asori səvənhi.

¹¹ In i nəgkiariien pərhiən:

Trini minuə səmamhə kitaha Iesu,
nənə tsaməkeikei mwi mhəmıru pəri kitaha
min.

¹² Trini minuə samərer əknekın ia nahatətəien
səkitaha,
nənə tsaməkeikei mwi mhərimənu pəri kitaha
min.

Trini minuə səni mə səreirei in,
nənə in mwi traməkeikei mini mə in rıreirei
kitaha.

¹³ Trini minuə kitaha səmwei ia nahatətəien
səkitaha,
in traməkwtəmhiri ihi kitaha,
ti nəri nə mə in ko rıpkətəfi mhə nəgkiariien
me səvənhi.

*Iərmama sə ramo tukwini amasan nari m
Kumwesən*

2:8: 1Kor 15:4,20, Rom 1:3 **2:9:** Efes 3:1,13, Fil 1:12-14 **2:10:** Kol 1:24 **2:11:** 2Kor 4:11 **2:12:** Mat 10:33 **2:13:** Rom 3:3-4, Nam 23:19, Taet 1:2

¹⁴ Tiko nærmama me sæim pwæh rerinraha ramrhi narimnari me i ikani. Tikini pen ti niræha i ia næmri Kumwesæn mæ tuhæpwæh nousariien ti nægkariien me. Noien næha ko ripko mhæ nari amasan riti, mætæ ramouraha a nærmama sæmæme kamhætærig. ¹⁵ Tikæmwur mæ ik iærmama riti sævæi wok sæ næpin Kumwesæn ramætæ wok sæim ko rini mæ “Wok sæim ramasan.” Nænæ tikæpwæh niregiien ikauris ti wok sæim, ti næri næ mæ ikamahatæn atukwatukw nægkariien sæ ro nipærhienien. ¹⁶ Mætæ nægkariien auær a me sævæi tiprænæ i, ik tikæpwæh niniiien. Nægkariien me næha tuhæiri pen nærmama hæuvæn isipwîn ti Kumwesæn. ¹⁷ Nægkariien sævæi nærmama sæmæme kamhægkiari iamînhi truviris ræmwhen ia nimwapw ruvehe masori. Nægkariien sævæi iæmæ mi næha Hameneus mine Faelitas ro iamînhi. ¹⁸ Irau krinouæpwæh raka nægkariien pærhien rauni mæ næpin sæ Kumwesæn tro nærmama me pam hætui mwi ia nemhæien ruvæuvehe raka. Ia nægkariien næha sævænrau kraouraha nahatætæien sævæi nærmama me nepwîn. ¹⁹ Mætæ næri æknekin Kumwesæn rinæmri kauvrhækin nimwæ ia tækuren ræpwæh nikiuiien. Nænæ kimærai pen nægkariien me i ia nikaren: Riti mæ, “Iærimænu ruvæukuræn raka mæ nærmama æfo me næha sævænhi.” Nænæ riti mwi mæ, “Pwæh nærmama pam sæmæme kamhæni nipærhienien ia næghi Iærimænu hæpwæh noien æræha.”

²⁰ Ia nækwai nimwæ asori riti næri kamæni pen

2:14: 1Tim 6:4, Taet 3:9 **2:15:** 1Tim 4:6, Taet 2:7-8 **2:16:** 1Tim 4:7 **2:17:** 1Tim 1:20 **2:19:** Nam 16:5,26, Jon 10:14, 1Kor 8:3, Aes 52:11 **2:20:** 1Kor 3:12

nari me irə səpəmsəpə. Ripko mhə səməme nəha əpa kino ia aean mi nəha kol mine silva, mətə nepwɪn mwi nəha ikin kinərai ia nɪpəri nei, nepwɪn mwi kino ia nise tɪprənə rərpwu muvehe mɪskai. Nepwɪn kaməni nari irə ia nəpɪn ikinan me. Nepwɪn kaməni nari irə ia nəpɪn auər a me. ²¹ Ro iamɪnhi irə trɪni mɪnuə iərmama riti rəpwəh noien ərəha me, məpərhi in, in truvehe məmwhen ia nəri kaməni pen nari irə sə kinəmri əpə mə səvəi nəpɪn ikinan me. Kinəpnəpenə raka irə mə iəmə asori səvəi nimwə nə rukurən nuvehien mo noien amasan me pam irə.

²² Mətə noien ərəha me ntəmaruə me hokeikei pɪk, ik tikaraka məpwəh nevənien ipaka tɪ nɪrəha. Ia nəpɪn me pam tikaməkeikei mamō noien atukwatukw, mamahatətə ia Kumwesən, mamokeikei nərmama, mamarə ia nəmərɪnuien. Tikamarə mamō noien me nəha kimiaha nərmama me nəha səməme kamhəkwein lərimənu ia rerɪnraha sə ratukwatukw məmher. ²³ Tikərər isipwɪn tɪ nəresien me nəha nərmama hərəirei nari kamhəni. Ikukurən mə nəresien me nəha kamhəvi pehe nəvisəien me. ²⁴ Mətə noien səvəi iərmama sə ramo tukwini nari m lərimənu traməkeikei mōpə. Ripko mhə in iərmama səvəi nəvisəien, mətə in iərmama sə ramasan tɪ nərmama pam. In iərmama sə rukurən nahatənien nərmama, nənə niemaha rɪpkəpi akwauakw mhə in. ²⁵ In iərmama sə raməgkiari məru tɪ nəmri atukwatukwien nərmama səməme haməmwəki in, pwəh Kumwesən rəsni irəha hərərig ia noien ərəha, mhəuvehe mhəukurən

nægkiariien pərhiēn. ²⁶ Ia noien nəha irəha ko həier irapw ia kwənkru səvəi Setan in rīməuvehi irəha irə mamō irəha hamō nəkwān.

3

Tramevən ipaka ti nəp̄in sampam

¹ Mətə tikaməkeikei mukurən nəri. Tramevən ipaka ti nəp̄in sampam narəien ia tiprənə i truvehe məknek̄in. ² Nərmama tuhokeikei atukw a irəha me, nənə mhokeikei p̄ik mane. Irəha tuhəfiutə atukw irəha me, nənə mhərpwi p̄ik irəha me. Irəha tuhəni nægkiariien ərəha mhəuəsi nərmama me i. Irəha tuhərui nəkwai tata mine mama səvənraha. Nəp̄in tukuvei pen nari amasan riti minraha, irəha tuhəpk̄ini mhə tanak tukwe. Irəha tuhəpko mhə nəkur ikinan me ia nirəha. ³ Irəha tuhəpk̄api mhə ti nərmama, mətə tuhərpw̄in a tai nərəhaien səvənraha. Irəha tuhəni n̄ikare nərmama. Irəha tuhəreirei nari, mamho pen a nari ia nəp̄in me, mhəpkokeikei mhə noien amasan. ⁴ Irəha tuhəvsini təkutanraha m̄ piəvnraha me, mho akwauakw noien ərəha, mhəpkətərig mhə ti noien səvənraha mine nəfe kamho. Irəha rerinraha trukuar ia nəgnəginiien atukw irəha me, mhokeikei p̄ik narimnari me n̄ipwranraha ramregi ramasan irə, nənə, mhəpkokeikei mhə Kumwesən. ⁵ Ia nəmri nərmama tukətoni irəha həmwhen ia nəkur əfwaki me, mətə nəgse Nən̄imw̄in səvəi nəfwakiien riwən ia nirəha. Nənə ik tikaməkeikei mərəer isipw̄in ti nərmama səməme hamō iam̄inhi irə.

3:1: 1Tim 4:1
2:19-20, Taet 1:16

3:2: Rom 1:29-31

3:5: Mat 7:15,21, Rom

6 Irəha me nəpwiŋ kəmhəuvnimwə ia nəkwai nimwə me mamheikuə ia niŋran me. Niŋran me nəha nəgsenraha riwən, həuvəpəmpəm ia noien ərəha me, nənə narimnari ərəha me səpəmsəpə hokeikei pik ramiri irəha. 7 Kamahatən irəha ia nukurənien ia nəpŋ me, mətə ko irəha həpkukurən amasan mhə nəgkiariien pərhiēn ia nəpŋ riti. 8 Ikukurən klepa mi nəha Janes mine Jampres sə krauni ərəha Moses fwe kupwən. Nərmama me i iakani, irəha həmwəhen ia nirau, mamhəni ərəha nəgkiariien pərhiēn. Irəha nərmama me nətəriġien səvənraha rikou, həpkahatətə pərhiēn mhə ia Kumwesən. 9 Mətə irəha tuhəpkarə əpwəmwis mhə. Nərmama me pam tuhətə sas noien ikou me səvənraha rəmwəhen ia nərmama me hənətə sas noien ikou səvəi Janes mine Jampres fwe kupwən.

Nəvəhagien sampam

10 Mətə ik, Timoti, nəpŋ ikinakurirə ia nirak fwe kupwən, ikuvəregi raka nahatənien səiou, minətə raka noien səiou sə iakamarə mamə. Ikinətə raka nəfə iakaməmwur tukwə ia nimiruien səiou. Ikinətə raka nahatətəien səiou, mine nətəriġien səiou sə iakaməfo mo raməpwəmwis. Ikinətə raka nokeikeiien səiou, mukurən mwi nərerien səiou sə iakamərer əknekŋ irə ia nəpŋ me. 11 Ikinətə raka nometəien me mine nəmisəien me kŋno ia nirak fwe ia taon me nəha Antiok mine Ikoniam mine Listra. Kinamometə iou iamŋhi irə, mətə Iərimənu səkitaha ruvehi raka iou ti nəmisəien

me pam naha. ¹² Nipərhienien, nərmama me pam səməme hokeikei mə tuhəuvehe mho kuatia irəha Iesu Kristo, nənə mamharə ia narəien sə Kumwesən rokeikei, tukaməkeikei kometə irəha. ¹³ Mətə nərmama ərəha me mine nərmama eikuə me narəien səvənraha sə rinərəha raka tripkuvehe mərəha mwī. Irəha tuhameikuə ia nərmama me, nənə mamheikuə atukw a mwī ia nirəha. ¹⁴ Mətə ik tikaməkeikei məkwətəmhiri əknekīn nəgkiariien sə kinahātən raka ik irə. Ikuvəni raka nipərhienien ia nəgkiariien naha, mahahtətə əknekīn irə, mukurən amasan nərmama səməme hənahātən ik irə. ¹⁵ Fwe ia nouihien səim ikuvəukurən raka nəgkiariien me səvəi Nəkukuə Ikinan. Nəgkiariien me naha kamhəuvei pehe nukurənien mik. Nukurənien naha ramiri pen ik ikevən mahatətə ia Iesu Kristo mə Kumwesən truvehimiru ik. ¹⁶ Nəgkiariien me pam ia Nəkukuə Ikinan haməuku pen ti Nənimwīn səvəi Kumwesən.^a Nəgkiariien me naha hamasitu ia kitaha. Kitaha səukurən ninien nəgkiariien me naha mhahātən nərmama, mhəni pui noien ərəha me səvənraha, mhəkoui atukwatukw irəha, mhəvəhag mīnraha ia noien atukwatukw. ¹⁷ Nəpīn samo iamīnha irə tro iərmama səvəi Kumwesən ruvehe məmwhen ti noien wok amasan me pam.

4

Timoti traməkeikei məvisau irapw nəgkiariien

3:12: Mat 16:24, Jon 15:20, Wok Me 14:22 **3:14:** 2Tim 2:2

3:15: Jon 5:39, 2Pit 1:20-21 **3:16:** Rom 15:4, 2Tim 2:21

^a **3:16:** Suatuk riti mwī ti ninien nəgkiariien i ia vas 16 ro iamīnhi irə: Nəgkiariien me pam ia Nəkukuə Ikinan Kumwesən rineiahag pehe irə.

amasan

¹ Timoti, təkwtəkwuni iakaməgkiari pehe mik rəmwhen krau krouærer ia nəmri Kumwesən mine Iesu Kristo. Ikukurən Iesu Kristo in iərmama sə trəkiri nərmama me pam ti noien me səvənraha, nərmama səməme kamhəmīru mine səməme həuvamhə raka. In trier pehe mwi mərīmənu ia nitətə səvənhi. Ti nəri nə mə tro iamīnhi irə, ro pen iakani pehe tukw ik i mə ² tikaməkeikei məvisau irapw nəgkiariien səvənhi, mamərer mwatuk tukwe ia nəpīn me pam, nəpīn nərmama hokeikei mə tuhəregi mine nəpīn nərmama həpwəh nokeikeiien mə tuhəregi. Tikini pui noien ərəha me səvənraha, mīnise pen əknekīn ti nīrəha mə tuhəpwəh, muvei pen nəgkiariien sə trasitu ia nīrəha, mo iamīnhi irə səim nətərigien rəpwəmwis, nənə, mahatən amasan irəha. ³ Tikaməkeikei mamə iamīnhi irə ti nəri nə mə nəpīn riti trīpkuvehe nərmama me tuhəpkətərig mhə nəgkiariien sə ro nīpərhienien, mətə irəha tuhesi pen nətərigien atukw səvənraha, nənə mhətui nahatən me səməme tuhəni nəgkiariien sə nəkwəreginraha rəfiəfiə ti nīregiien. ⁴ Irəha tuhəpwəh nəgkiariien sə ro nīpərhienien, nənə mhəuvən mhəkurirə kwənagei eikuə me. ⁵ Mətə ik, tikaməkeikei mo nətərigien səim pwəh raməmak amasan ia nəpīn me. Tikərer əknekīn ia nəmīsəien me sə kamo ia nīram, nənə mo wok i səvəi nəvisaiien nəgkiariien amasan, nənə mo pam wok səim sə Kumwesən ruvei pehe mik mə tiko.

⁶ Iakani iamīnhi irə ti nəri nə mə trīpkə mhə

tui nitek raiu rəmwhen ia waen i kətəgi pen ia təkure nifətə kuvei pen m Kumwesən. Səiou nəpɪn takier irə ruvəuvehe ipaka. ⁷ Ia nimiruien səiou rəmwhen mə iakamaruagən ia naruagənien amasan riti. Rəmwhen mə iakamaiu ia naiuien əknekɪn riti. Nənə təkwtəkɥuni iakɪno sam-pam irə, nənə iakamahatətə ihi. ⁸ Təkwtəkɥuni kɪnəpnəpenə kəfəfau riti fwe səiou kaməfəfau pen ia nəmə atukwatukw me. Iərimənu səkitaha raməkiri atukwatukw nari in truvei pehe kəfəfau nəha miou ia nəpɪn səvənhi. Tripkuvei pehe əpa mhə miou, mətə truvei pen mwi m nərmama me pam səməme hokeikei in nənə mamheitenhi in mə truvehe mwi.

Pol rokeikei mə Timoti trevən mətoni in

⁹ Tikaməmwur muvehe mətə akwauakw iou, ¹⁰ ti nəri nə mə Temas rokeikei pɪk anan narəien ipwet mine səvəi tɪprənə i, nənə minəpwəh iou, muvavən fwe Tesalonaeka. Kresens ruvavən fwe Kalesia, nənə Taetas ruvavən fwe Talme-sia. ¹¹ Təkwtəkɥuni Luk əpa ramarə kimrau min. Nəpɪn tikauvehe irə tikiri Mak kimirau min, ti nəri nə mə in rukurən nasituien mo tukwini nari miou. ¹² Iakɪnərhi pen Tikikas ruvavən fwe Efes-sas. ¹³ Nənə nəpɪn tikauvehe irə, tikuvehi karkahu səiou səvəi nəkwieiiien iakɪnəpwəh raməmak ia nimwə səvəi Karpas fwe Troas. Tikuvehi mwi nəkukuə me. Iakokeikei pɪk mə tikuvehi səməme nəha kimərai pen ia teki nəni.

¹⁴ Fwe kupwən, Aleksanta, iəmə sə ramo nari ia

4:7: 1Tim 6:12 **4:8:** 1Kor 9:24-25, Rev 2:10 **4:9:** 2Tim 1:4 **4:10:** Kol 4:14, Taet 1:4 **4:11:** Kol 4:14, Wok Me 15:37-39
4:12: Efes 6:21-22 **4:13:** Wok Me 20:6 **4:14:** 1Tim 1:20, Sam 62:12, Prov 24:12, Rom 2:6

aean, ro pik n̄mis̄aien miou. Īarim̄anu tr̄arpw̄in noien ̄ar̄aha me n̄aha r̄ino miou. ¹⁵ N̄an̄a ik mwi tikam̄akeikei m̄asiari in, t̄i n̄ari n̄a m̄a fwe kupw̄an in ram̄amw̄ur m̄a tr̄inise n̄agkiariien s̄akitaha.

¹⁶ N̄ap̄in iakin̄arer vi ia n̄amri iam̄a asori ia kwopun i m̄a tak̄ini irapw̄ n̄agkiariien s̄aiou ia n̄ikaren s̄av̄ai n̄agkiariien me n̄aha kam̄ini ̄ar̄aha iou ir̄a, īarmama riti riw̄an ruvehe m̄arer ia n̄ikarek m̄a trasitu. M̄at̄a ir̄aha pam hap raka ia nirak. (Iak̄əfwaki m̄a Kumwes̄an tr̄arpw̄ah n̄arpw̄inien noien n̄aha m̄inraha.) ¹⁷ M̄at̄a ia n̄ap̄in n̄aha Īarim̄anu s̄akitaha ram̄arer ipaka tukw̄ iou, mauvei pehe n̄iskaiien miou, m̄a iou iakukur̄an n̄avisau irapw̄ien n̄agkiariien me pam s̄av̄anhi, n̄an̄a n̄armama me pam s̄am̄ame h̄areirei Kumwes̄an h̄akukur̄an n̄iregiien. N̄an̄a in ruvehi raka iou ia n̄ar̄ahaiien n̄aha r̄amw̄hen m̄a ruvehi raka iou ia n̄akwai laeon. ¹⁸ Īarim̄anu s̄akitaha truvehi raka iou ia noien ̄ar̄aha me pam n̄armama h̄anūa tuho ia nirak. In tr̄at̄a amasan iou meste in ruvehi iou mev̄an fwe ia nit̄at̄a s̄a in ram̄arim̄anu ir̄a fwe ia neiai. Pw̄ah n̄agn̄aḡiniien rev̄an tukwe in ia nuk nuk me. Oūah, pw̄ah ro iam̄inhi.

N̄agkiariien sampam

¹⁹ Tik̄ini pen t̄i Prisila mine Akwila mine n̄armama me pam ia n̄akwai nimw̄a s̄av̄ai Onesiforas m̄a iak̄ini ramasan t̄i nir̄aha i.

²⁰ Erastas ripkukur̄ir̄a mh̄a iou. In ramar̄a a fwe Korin. N̄an̄a iakin̄arpw̄ah Trofimas fwe Maelitas, t̄i n̄ari n̄a m̄a in ramemh̄a. ²¹ Tikam̄amw̄ur muvehe

akwauakw tukw iou kurirə nəpɪn səvəi nəkwieien
ruvehe.

Iupulas, Putens, Linus, Klautia mine piəvtaha
me pam ia kwopun i həni ramasan tukw ik.

²² Pwəh Iərimənu səkitaha tramarə ia rerim,
məriari pehe namasanien m kimiaha pam.

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 22 Feb 2024 from source files dated 31 Aug 2023

26b0f540-c192-5878-be67-18ede9ab1416